


Ulloq 18. november 2021

Inuit Ataqatigiit, Naleraq, Demokraatit Atassutillu

akornanni

2022-mut Aningaasanut inatsit pillugu isumaqatigiissut



2022-mut aningaasanut inatsit pillugu isumaqatigiissut

Partiit isumaqatigiissuteqartut 2022-mut aningaasanut inatsit makkuninnga ukkataqartoq isumaqatigiissutigaa:

Aallaqqaasiut

2021-mut aningaasanut inatsimmik ilusiliiniarluni suliaqarneq COVID-19-ip atuunneranik sunnerneqarpoq, tassanilu mianersortumik periuseqarnissap annertuumik pingaarnersiueqqinnerit Namminersorlutillu Oqartussat isertitaannik missingersuutini annertussusiliinermi mianersortumik periuseqartoqarpoq. Tamanna aamma ukiumi missingersuusiorfiusumi 2022-mi isertitassatut ilimagineqartunut tunngatillugu kinguneqarpoq.

Kalaallit Nunaat nunanut allanut amerlanernut sanilliulluni COVID-19-imik aniguilluarneruvoq. Tamanna aamma aningaasarsiornikkut patsiseqartumik pitsaasuuvoq. Aningasaqarnermut Siunnersuisoqatigiit 2022-mi ukiakkut nalunaarusiaminni 2022-mut aningasaqarikkut siuariartornissamut missingersuutiminik nutarterivoq, Akileraartarnermullu Aqutsisoqarfiup Namminersorlutik Oqartussat akileraartutinit akitsuutinillu isertitassaatut missingiussat nutaat naammasseqqammerpai, taakkulu 2022-mut Aningaasanut Inatsisissatut Siunnersuutaqaqartumit pitsaanerupput.

2022-mut aningaasanut inatsit pillugu isumaqatigiissut tamakkunannga ersersitsisuuvoq, isertitassatummi missingerneqartut nutartikkat Qaqortumi mittarfimmuut nutaamut aningaasalersuineq, soraarnerussutisianik immikkoortumi aqqiissut, sinerissap qanittuani qaleralinniarnermut akitsuummumut oqilisaaneq, sanaatornermut sinaakkutit pilerseqqinneqarnerat, iluarsaassinernut aningaasaliissutit amerlineri, kiisalu Namminersorlutik Oqartussat ingerlatsineranni missingersuutininik iluarsiiissutit ajorseriartitsisutut ilanngunneqartut oqimaaqatigiissinnerat pisinnaanngortippaat.

Aningasaqarnermi politikimi anguniakkat pingaarnerit

Isumaqatigiissuteqartut piffissami ataatsimut aningaasanut inatsisiliorfiusumi 2022-2025 IS-ip inernerani sinneqartoortoqarnissaa qulakkeerpaat. Tamanna siunissamut ineriartortitsinerumut aningaasaliinernut kiisalu immikkoortuni ataasiakkaani kinguaattoorfiusimasuni siunnerfeqartumik pitsanngoriartitsinermi pingaarnersiuinermi, taamatullu immikkut pisariaqartitsisunut sullissinerup pitsaanerulersinneqarnissaanik politikikkut kissaateqarnerup peqatigisaanik pivoq. Taamaalluni suliniutinut aningaasartuuteqarfiusussanut siunnersuutit isumaqatigiissutikkut matumuuna aningaasalersorneqarput.

Attassinissamik naalagaaffimillu akisussaaffinnik tigusinissamut inissaqartitsinermik qulakkeerinninneq

Aningasaqarnermut politiki ukiuni sisamani aningaasanut inatsisiliorfiusumit sivilisunerusumik atuunnissaa isumaqatigiissuteqartut peqatigisaanik eqqummaariffigaat. Ukiut qulinit 15-it tungaannut aggersuni innuttaasut katitigaaneranni annertuumik allanngortoqarnissaa pisortat ingerlatsiviata siunissami aningaasalersornissaata isumannaarnera, taamatullu aningaasartuutit isertitallu oqimaaqatigiinnissaanik qulakkeerinnittunik aqqissusseqqinnissanik isumannaarinerit isumaliutigineranni ungasissumut siunnerfeqarnissaaq pingaaruteqarpoq.

Inatsisartut isumaqatigiittut UKA 2021-mi Kommuninut Namminersorlutillu Oqartussanut missingersuutitut naatsorsuutinullu inatsisip allannguutai akuereqqammerpaat, taakku siunissami pisortat ataatsimut ingerlatsivianni aningaasartuutininik ineriartornerup aqunneqarneranut sinaakkusiipput.

Attassiinnarnissamut Ineriartortitsinissamullu Pilersaarummik sisamanik aqqissuusseqqinnermut sammivilimmik, aqqissuusseqqinnermik pingaarnersiukkanik pisariitsunillu ataqatigiissunillu aqqiissutitut suliniutinik imaqartussamik piareersaasiornissaaq Naalakkersuisut akuereqqammerpaat.

Aqqissuusseqqinnermik suliaqarneq taamaattoq peqataatitsinissamik aalajangernissamut tunngavissianik nukittuunik, ukiunilu aggersuni inuiaqatigiit ineriartornerannut pisariaqartumik akisussaaqataannissamut

politikikkut piumassuseqarnissaq tunngaviusaaq. Isumaqatigiissuteqartut aaqqissuusseqqinnerni immikkoortuni ataasiakkaani suleqatigiilluarnissartik isumaqatigaat.

Aningaasaqarnikkut naligiinnginnermik akiuinnermut attuumasumik isumagininnikkut akileraartarnikkullu aaqqissuusseqqinnissamik pilersaarutit

Isumaqatigiissuteqartut aamma ukiuni arlalinni inuit isertitakinnerusut inuuniarnikkut atugaannik pitsannguinnissamik kissaateqarnerup maanna iliuuseqarfigineqarnissaa isumaqatigiissutigaa. Isertitatigut naatsorsoqqissaakkat piffissap ingerlanerani aningaasaqarnikkut naligiinnginneq annertusiartuinnartoq takutippaat. Peqatigisaanillu suliffeqartut amerlanerulersinneqarnissaata sulissutigineqarnerunissaa pisariaqartinneqarpoq, taamaaliornerlu amerlanerit isertitaqarnerulernerannik nassataqassaaq – minnerunngitsumik Nuup avataani.

Inunnut akileraarutit aaqqissuuteqqinneqarnissaata piareersaasiornissaanut sinaakkutit naapertuuttut makkuninnga nassataqarpoq:

- Piaartumik inuit akileraaruserneqartarnerisa aaqqissuusseqqinnissaat suliarineqassaaq, taannalu inuussutissarsiutinik ingerlatsisut akileraartarnikkut aaqqissuusseqqiffigineqarnerannik malitseqassaaq, pisortat ikiorsiissutaannik soraarnerussutisariatitaannillu siunnerfilimmik nalimmassaanermik ilaqartinneqarsinnaasumik.
- Suliffeqarnermut akuunissamut pilerilersitsineq nukittorsarneqassaaq.
- Pisortat aningaasaqarnerisa ungasissumik sammitinneqarnissaanik anguniagaqarneq attanneqassaaq, peqatigisaanillu isertitanut akileraarutit tamarmiusut qaffanneqannginnissaat attanneqassaaq.

Taamaalillutik aningaasanut inatsimmik isumaqatigiissuteqartut naligiinnginnerup minnerulersinnissaanut sukumiisunik suliniuteqarnissap ingerlannissaa isumaqatigiissutigaa. Taamaamat misissueqqissaarnernik inatsisiliorinnissamullu piareersaatiniq sulinerit naligiinnginnermik annikinnerulersitsisunik, suliffeqarnermullu attuumassuteqarnerup aningaasaqarnikkut pilerinartuunissaanik siuarsaasunik suliniutinik ilusiliissusat aallartinneqassapput. Naalakkersuisut sulinnermut tassunga atatillugu aamma pinngitsoornani soraarnerussutisiaqalernissamik katersinermik aaqqissuusinnermi inatsisip equngassutigisinnaasaanik inatsisissatut siunnersuutissamut atatillugu aaqqiinissaaq siunertaralugu misissussagaat isumaqatigiissuteqartut eqqummaariffigaat. Tassani aamma pissakinnerit utoqqaallu akornanni aningaasaqarnikkut naligiinnginnerup killilersimaarnissaa eqqummaariffigineqassapput.

2022-mi ukiuniluunniit missingersuusiorfiusuni suliniutinut aalajangersimasunik aningaasanik immikkoortitsisoqanngilaq. Pisortat aningaasaqarnerata akileraarusiinerup qaffakkiartorfiginngisaanik patajaatsuunissaanik piumasaqaatip, suliniutit ataatsimut isigalugit imminnut matussusertuunissaat, taamaalillutillu akileraarusiinnermik akitsuusiinnermillu ingerlatsinnermi aningaasalersorneqarnissaat nassataraa, tamannalu aningaasaqarnikkut naligiinnginnerup minnerulersinneqarnissaanik pingaarnertut anguniagaqarnermut naapertuuppoq.

Suliaq tamanna tunuliaqutaralugu aaqqissuusseqqinnissanut taakkulu aningaasalersornissaannut politikikkut siunnerfissat ersarissarnerunissaat siunertaralugu, 2022-mi suliniutit sukumiisut inatsisissatut siunnersuutitigut piviusunngortinneqarnissaat siunertaralugu, piaartumik politikikkut oqaloqatigiittoqarnissaanik ingerlatsinissaaq isumaqatigiissuteqartut kissaatigaat.

Utoqqarnut periusissiaq utoqqalinnermilu siusinaartumillu soraarnerussutisialinni pitsanngorsaaneq

Aningaasanut inatsit pillugu isumaqatigiissummik suliaqarnermi 2023-mut aningaasanut inatsisissatut siunnersuummi utoqqalinnermi siusinaartumillu soraarnerussutisialinnut pitsanngorsaattissanut sillimmatit immikkoortinneqartut atugassanngortinneqarput, tamannalu immikkoortumi pitsannguinnissamik ataatsimut kissaateqarnermik ersersitsillunilu maanna aaqqissuusinnermi equngassutinik iliuuseqarnissamik ersersitsisuuvoq. Aningasanut inatsit pillugu isumaqatigiissut ulloq 1. juli 2022 atuutilersumik pitsannguutiniq sukumiisunik tulliuuttunik kinguneqarpoq:

Partiit makkuninnga isumaqatigiissuteqarput:

- Utoqqalinersiutillit nammineq angerlarsimaffiminni najugaqanngitsut utoqqalinersiutai 46 %-init 50 %-imut qaffaavigineqassasut, taakku ukiumut 29.550 kr.-nit 34.050 kr.-nut qaffaanermik naleqarput.
- Utoqqalinersiutip tunngaviusumik aningaasartai 64.239 kr.-nit 73.239 kr.-nut qaffanneqassapput.
- Siusinaartumik soraarnerussutisiallit ulloq unnuarlu angerlarsimaffinnut inissinneqartut kaasarfimmui 23.736 kr.-nit 30.840 kr.-nut qaffanneqassapput.
- Siusinaartumik soraarnerussutisiat qaffanneqassasut inissisimaffik qaffasinnerpaaq 118.680 kr.-nit 124.340 kr.-nut, taamatullu aamma akunnattumik appasinnerpaamillu siusinaartumik soraarnerussutisiat.
- Nammineq aapparissallu isertitai siusinaartumik soraarnerussutisiat appariartortilinninneranni killigitap immikkut tamanut 10.000 kr.-nut qaffanneqassapput.

Aningaasaliissutinik taakkuninnga atugassanngortitsineq namminermini naammanngilaq, taamaammallu utoqqarnut susassaqarfimmi piffissaq ungasinnerusooq ataqqatigiissumillu politikki eqqarsaatigalugu isigineqartariaqarluni. 2022-mi ataatsimut utoqqarnut periusissiamik saqqummiussinissaq Naalakkersuisut ilimagaat, taannalu ukiumi qulinit 15-inut tullernut inuiaqatigiinni utoqqaat amerlanerulernissaanik aallaaveqassaaq. Tamanna kommunit Namminersorlutillu Oqartussat akornanni pitsaasumik naapertuuttumillu sulianik avitseqqatigiinnissamik pisariaqartitsivoq.

- Tassunga atatillugu ilaatigut inissiat utoqqarnut naleqquttut, utoqqaallu illui amerlanerit pisariaqartinneqassapput. Ullumikkut aningaasanut inatsimmi kommunit taamaattunik sanaartornissaannut tapiissuteqarsinnaaneq periarfissaareerpoq. Maannakkuugallartoq taanna aallaavigalugu suliat nanginneqassapput, tassani aamma Avannaata Kommunian suleqqatigalugu aallaqqaammut Ilulissani utoqqaat illuannik nutaamik pilersaarusiornissamut tapiissutinik tunniussisinnaaneq ilanngullugu. Utoqqarnut periusissiassaq siunissami pilersaarusiornierup akisussaaffillu agguarneqarnerata pitsannguutissaatut siunnersuummik imaqqartariaqarpoq, taamaalilluni ukiumi aggersuni pisariaqartumik aningaasaliinerit marloqiusamik allaffissornermik marloriaammillu aalajangiinernik ingerlatsisarnernik akimmiffeqaqqunagit.
- Utoqqaat amerlinerat isumaginninnermi peqqinnissaqarfimmilu immikkoortumi sulisut amerlanerulernissaanik pisariaqartitsinerup iliuuseqarfiginissaanut siunnerfilimmik, ungasissumullu isigisumik pilersaarusiornissamik aamma pisariaqartitsiviussaaq. Tamanna ilinniartitaanerni pilersaarusiornermi Naalakkersuisut iliuuseqarfigissallugu naatsorsuutigaat.
- Utoqqalinersianik pitsannguinerit pissarsisartut ineqarnermut tapiissutissanut sunniuteqannginnissaat isumaqatigiissuteqartut isumaqatigiissutigaat. Taamaammatt inatsisip naapertuuttut nalimassarneqarnissaat siunertaralugu kinguneqaatit qulaajaavigineqarnissaat aallartinneqassaaq. Inatsisissatulli siunnersuutaasinnaasoq siusinnerpaamik 2022-mi piareersimasinnaavoq.

Isumaqqatigiissuteqartut taamaalillutik isumaqatigiissutigaat utoqqalinersiallit siusinaartumillu soraarnerussutisiaqartunik pitsannguneq soraarnerussutisiallit atugaasa ataatsimut isigalugu pitsanngorsaqinnissannut alloriarneq siulliusoq.

Soraarnerussutisiaqalernissamut aqqissuussinnermut peqataasussaataaneq

Isumaqqatigiissuteqartut isumaqatigiissutigaat soraarnerussutisiaqalernissamut aqqissuussinnermut peqataasussaataanerit inatsisip iluarsartuunneqarnissaa, ingammik qulakkeerniarlugu innut-taasut, isertitakinnerpaat, inatsimmi naapertuulluannngitsumik nammakkersorneqarnerisa aqqiiffiqineqarnissaat siunertaralugu. Isumaqqatigiissuteqartut tamanna iluarisimaarpaat. Isumaqqatigiissuteqartut tamanna toqqammavigalugu Naalakkersuisunut kaammattuuteqarput soraarnerussutisiaqalernissamut aqqissuussinnermut peqataasussaataaneq pillugu inatsisip 2022-ip ingerlanerani pisarialimmik

allanngortinneqarnissaa siunertaralugu inatsisissatut siunnersuummik saqqummiussaqaassasut inatsisip iluarsartuunneqarnissaa anguniarlugu.

Isumaqatigiissuteqartut taamaattoq maannangaaq kissaatigaat aningaasanut inatsimmi oqaasertaliussanik ilaneqassasoq, ileqqqaartussaataitanermut pisussaaffimmik eqquutsisimangitsut aammalu ileqqqaartussaataitanermut pisussaaffimminnik, ukiumi akileraarfiusumi 2018-mi, 2019-mi 2020-milu aallaaveqartunik, akiliuteqarsimangitsut pillugit iliuuseqarnissamut piginnaatitsisunik. Tamatuma kingunerissavaa Akileraartarnermut Aqutsisoqarfik 2022-mut siusinnerusukkut ukiuni ileqqqaartussaataitanermik pisussaaffinnik eqquutsisisoqarsimanginneq tunuliaqutigalugu qaffa-sinnerusumik akileraartussanngortitaasimasunut qaffasinnerusumik akileraartussanngorlugit akileraartarnermut uppersaatinik tunniussissanngitsoq.

Isumaqatigiissuteqartut aammattaaq isumaqatigiissutigaat inatsisip atuuffia nalimmassarneqartariaqartoq, taamaasilluni ileqqqaartussaataitaneq ukiumut isertitat akileraarutaasussat 125.000 kr.-t aallannerfigalugit pisussaaffinngortissallugu ullumimut atuuttumi 100.000 kr.-t (ileqqqaartussaataitanermut toqqammavittut taaneqartartoq) aallaaviusarsimasuniit qaffallugu.

Akiligassat 4.000 kr.-t ataallugit aningaasartaqartut akilersinniarneqartassanngillat. Taamaasilluni tamanna 2.000 kr.-nit qaffanneqarpoq.

Ilanngullugu Akileraartarnermut Aqitsosqarfik piginnaatinneqarpoq inuit ileqqqaartussaataitanermut pisussaaffimminnik eqquutsisisimangitsut pisussaaffinnik appaanissaanut imaluunniit atorunnaarsinnissaannut, tamanna kommunip inassuteqarneratigut isumaginninnikkut peqquteqarsimappat.

Isumaqatigiittut naggataagut isumaqatigiissutigaat utoqqalinersiaqartitsisarnermi aaqqissuussinitsinnik aammalu soraarnerussutisiaqalernissamut aaqqissuussinnermut atatillugu allannguisoqarnerani pingaaruteqartoq suliffeqarnermi susassaartut, aningaaseriviit aammalu soraarnerussutisiaqalernissamut aningaasaateqarfiit kiisalu politikikkut suliarlut partiit siammasissumik il.il. akuutinneqartarnissaat. Soraarnerussutisiaqalernissamut ileqqqaartut sulit utoqqalinersiaqartunut tamanut toqqissisimanermik pilersitsisussaapput, aammalu tassunga atillugu pingaaruteqarpoq kinguaariit uagut kingulissatsinnut naapertuilluannngitsumik nammatassiinnginnissarput.

Pisuussutit uumassusillit isertitanik pilersitsiviusumik piujuartitsisumillu iluaqutigineqarneri

Sinerissap qanittuani aalisarnerup immikkoortuini pingaarnerni isertinneqartartut appasinnerat Aalisarneq pillugu Ataatsimiititaliarsuup isumaliutissiissutaani uppersarneqarpoq, tassanilu sinerissap qanittuani qaleralinniarnerni aalisartut amerlasuut isertitaasa appasissuunerat ilanngullugu. Tamanna tunngavigalugu aalisarnermi pisuussutinik iluaquteqarnermi akitsuusersueriaatsimik tunngaviusumik eqqarsaammi, sinerissap qanittuani qaleralinniarnerni akitsuutit annertussusilerneqarnerata isumaliutiginnissaa pissusissamisoorpoq.

Taamaammat aningaasanut inatsimmik isumaqatigiissuteqartut maannakkuugallartoq sinerissap qanittuani qaleralinniarnerni pisanut akitsuutip taamaaginnartinnissaanut piffissaanngitsoq isumaqatigiissutigaat, peqatigisaanillu aalisarnernit allanit annertunerujussuarmik isertitaqarnerusinnaanermik periarfissaqarnerata qulakkeerneqarsinnaanera. Aningaasanut inatsimmik isumaqatigiissut tulluittumik periutsimik inerneqarpoq, peqatigisaanillu ulloq 1. januar 2022-mit atuutilersumik aningaasanut inatsimmi oqaasertaliinikkut nalimmassaanermik malitseqarlunilu, 2022-mi sinerissap qanittuani qaleralinniarnerni akitsuut 0 %-mut inissinneqassaaq. Pisuussutit uumassusillit inuiaqatigiit kalaallinit pigineqarnerannik toqqammaveqarneq sanioqqunneqanngilaq, aalisarnerulli immikkoortuani tassani maannakkut isertitaqarnerup 2022-mi akitsuutip atorunnaarsinneqarnera pisariaqalersippaa.

- 2022-mi sinerissap qanittuani qaleralinniarnerni akitsuut 0-imut inissinneqarpoq.

- Sinerissap qanittuani qaleralinniarneq 2022-mi Naalakkersuisut aalisarnermut inatsimmi siunnersuusiornissaannut ilaavoq.
- Akitsuummik appaaneq avataasiarluni raajarniarnermi qaleralinniarnermilu akitsuutip qaffanneqarneratigut matussuseqassaaq.

Suliniut taanna ikaarsaariarnermi aaqqiinertut isigineqarpoq. Taamaalilluni sinerissap qanittuani qaleralinniarnerup aaqqissuussaanerani tunuliaqutaasut ajornartorsiutit peerneqanngillat. Taamaammat Naalakkersuisut 2022-mi Aalisarneq pillugu Ataatsimiititaliarisup taakkuninnga aalisarnermillu inuussutissarsiornerup ilaani allani aaqqissuussaankkut ajornartorsiutinik aaqqiinissamik kaammattuutaanut malitseqartitsinissaminut siunnerfiminnik saqqummiussinissaat ilimagineqarpoq. Tamanna nutaamik aalisarnermut inatsiseqalernissami UKA2022-mi naatsorsuutigineqartumi saqqummiunneqartussami pissaaq. Tassani aalisarnermut inatsisissat siunnersuummik nutaamik saqqummiussinissaq sioqqullugu, aalisarnermik inuussutissarsiorlut immikkoortumilu pingaarutilimmik soqutigisaqartut qanimut oqaloqatigineqarnissaat ilimagineqarpoq, taamaaliornermilu aalisarnermut inuussutissarsiornerup aamma piffissaq ungasinnerusoq isigalugu nunatsinni aningaasarsiornermi pingaarnertut inissisimanerata attatiinnarneqarnissaa, kiisalu piujuartitsisumik toqqammaveqartumik aningaasanik isertitsillunilu suliffissaqartitsinerup isumannaarneqarnissaa pisinnaaqullugu.

Tamanna tunuliaqutaralugu isumaqatigiissuteqartut Naalakkersuisunik oqaloqatiginninnermik nangitsinissartik qilanaaraat, peqatigisaanillu kaammattuutit isertitanik annertusaasinnaasut Nunattalu Karsianut iluaqusiinnaasut piujuartitsinermillu aqutsinermik qulakkeerinnissasut piviusunngortinneqarnissaannik kissaataasinnaasut suliarineqarnissaat siunniullugu. Taamaammat AIS 2022-mi suliniutit taamaattut Aalisarneq pillugu Ataatsimiititaliarisup isumaliutissiisutaanik ataatsimut naliliinissamut utaqqineqartariaqanngitsut, piviusunngortinnissaannut aningaasaliissutinik annikinnerusunik immikkoortitsisoqarnissaa siunnersuutigineqarpoq. Aningaasaliissutit aallaqqaammatt sillimmatinut Aningaasaqarnermut Akileraartarnermullu Ataatsimiititaliami sioqqutsisumik suliarinninnerup kingorna atugassanngortinneqarsinnaasunut inissinneqarnissaat siunnersuutigineqarpoq. Taakku ilinniartitaanermit pilersaarusernermullu suliniutinut, ilaatigut kilisaatini nunaqavissunik aqumiunik atuinermik annertusaanernut, ilaatigullu aalisarnermut inuussutissarsiornermut sammititanik piginnaanngorsaanermik siunnerfilinnik suliniutinut allanut atugassanngortinneqarsinnaapput. Aningaasalli aamma aalisagaqatigiinnik nutaanik pioreersunilluunniit iluaquteqarnerup patajaallisarnissaa siunertaralugu aalisagaqassutsimik misissuinerlut, kiisalu piujuartitsisunik aqutsinermik pilersaarutinik nutaanik suliaqarnermut atatillugu aalisartunik suleqateqarnermik pitsanngorsaanermit atornerqarsinnaapput.

Innuttaasut inuuniarnerminni aningaasartuutaannik oqilisaaneq

Kaffinut, tiinut timmiaatinullu eqqussuinermit akitsuutit peerneqarnissaat isumaqatigiissuteqartut isumaqatigiissutigaat. Suliniut atuisut ulluinnaannik oqilisaassinissamut alloriarneruvoq siulleq.

Iluarsaassinernut aningaasanik isumannaarinninneq iluarsartuussinissanillu kinguartoorutinik ikilisaanissaq

Piffissami kingullermi Namminersorlutik Oqartussat inissiaataasa iluarsartuunneqartannginnerannik ajornartorsiut annertuumik sammineqarpoq. Tamanna minnerunngitsumik Namminersorlutik Oqartussat inissiaataannut attartortittakkanut tunngavoq, tassami ajornartorsiut annertooujussuanngorpoq, ingerlaavartumillu aserfallatsaaliinermit naammattunik aningaasaliisoqartannginnerata nassatarisaanik ukiuni arlalinni pileriartorluni. Tamanna aamma annertuumik iluarsaassinissamik pisariaqalersitsillunilu piffissaliussat sioqqullugit illuutit taarsersorneqarnissaannik kinguneqarpoq.

Ajornartorsiut taamaattoq aamma inuiaqatigiinni susassaqarfinni pingaarutilinni allani arlalinni aamma atuuppoq, tassani Nukissiorfiit pilersuinermit atortuutaannut, umiarsualivinnut, mittarfinnut kollegianullu aamma pissutsit ilanngullugit.

Aningaasaqarnerinnaq isigalugu Namminersorlutik Oqartussat inissiatigut, illuutitigut allatigut attaveqaatitigullu atortuutaasa aserfallannginnissaat aningaasalersueriaatsikkut pingaaruteqarpoq. Taakku ingerlannissaannut aserfallatsaalinnissaannullu aningaasartuutit taakkunangalu isertitat oqimaaqatigiittariaqarput, isertitallu nalinginnaasumik atuisut akiliuteqarnerisigut aamma/imaluunniit aningaasanut inatsimmi aningaasaliissutitigut pissarsiarineqartarput. Maannakkut inissianut attartortittakkanut atatillugu pissutsit qulaajarluarneqareerput, Nukissiorfiit atortuutaannut umiarsualivinnullu atatillugu naammaginantumik uppersarsarneqareerlutik, illuatungaanilu ilaatigut mittarfinnut heliportinullu taamatullu ilinniartinnut kollegianullu tunngatillugu nalunaarsuinerit annertunerunissaat pisariaqartinneqarpoq.

Susassaqarfinni pingaarutilinnut tamani siunissami iluarsaasarnissat qulakkeerniarlugit, pisariaqartitanut ilisimasaniq pilersitsinissaq akimuisumillu aaqqissuussinermik sinaakkutinillu qulakkeerininnissaq tamaniit soqutigineqarpoq. Taamaammat 2022-mut aningaasanut inatsimmut isumaqatigiissuteqartut susassaqarfinni suliniutit pingaarnerutinneqarnissaat kissaatigaat, aamma ataatsimut aningaasaliissutinut sinaakkutit ilanngullugit. Naalakkersuisut tassannga malitseqartitsinissaq ilimagaat, ingerlaavartumillu susassaqarfinni killiffimmik siuariartornermillu nalunaaruteqartarnissaq naatsorsuutigalugu.

Iluarsartuussinerunissaq taamaallaat aningaasalersuinissamik qulakkeerininnermut tunngassuteqanngilaq. Pissut pingaartoq tassaavoq sanaartornermik susassaqarfiup suliaqarnerunissami naammassisaqarsinnaanermik qulakkeerininnissaa. Inuussutissarsiorfimmu tassunga amerlanerusunik ilinniartitsinissaq nunaqavissullu suliffeqartut amerlisinnissaat periarfissatsialaavoq, tamannalu nunamut tamarmut pitsaasumik sunniuteqassaaq. Naalakkersuisut ilinniartitaanermut suliffeqarnermullu tunngatillugu susassaqarfinni tulleriarnermi salliuutitsinerat tunngavigineqarpoq.

Inuussutissarsiorneq, takornariatitsineq attaveqaatinullu aningaasaliinerit

Mittarfiliortiternernut aningaasaliinissaq politikikkut siammasissumik isumaqatigiissutaavoq, ilaatigut Ilulissani Nuummilu atlantikoq qulaallugu mittarfinnik nutaanik sanartornikkut, ilaatigullu Qaqortumi nunap immikkoortuani 1.500 meterimik mittarfiliornikkut. 2022-mut aningaasanut inatsimmik isumaqatigiissutikkut kingullertut taaneqartup aningaasalersornissaanut aningaasaliissutissatut pisariaqartinneqartut sinneri nassaarineqarput, tamatumalu sanaartornerunermik sulinerup 2022-mi aallartissinnaanera pisinnaanngortippaa.

Mittarfiit nutaat taakku suliniut piffimmi nunallu immikkoortuini inuussutissarsiornikkut takornariatitsinikkullu malitseqartinneqalerpat nunatsinni naleqalersitsissapput. Tassani mittarfiit nutaat taakku sumiiffinni nunallu immikkoortuini ineriartornermik ikorfartuissapput, taamaalillutik sanaartukkat tamanut iluaqutaassallutik.

Taamaammat Naalakkersuisut periusissiamik nutartikkamik tassungalu atasumik ukiuni aggersuni soqutigisaqartunik attuumassutilinnik suleqateqarnikkut takornariaqarnermut susassaqarfinni pilersaarutiniq suliaqarnissaat, isumaqatigiissuteqartut naatsorsuutigaat. Nunat sanilivut assigalugit takornariaqarnermi siuariartortitsineq pilersittariaqarparput. Tamanna piujuartitsisumik toqqammaveqartumik pissaq. Illoqarfinni nunaqarfinnilu mikisuni, taamatullu pinngortitap qajannartuunera eqqarsaatigalugu, ingammik 2024-p kingorna takornariat unamminartumik amerleriarnerat sullissivigineqarsinnaassaaq. Siuariartorneq taamaalilluni illoqarfinnut pingasunuinnaq iluaqutaanani, nunallu immikkoortuinut siammasissumik sunniuteqassaaq.

Isumaqatigiissuteqartuttaaq nioqqutissat puuinik utertitsisarnermik nutaamik siammasinnerusumillu isumaliuteqarnerit inaarsarneqarnissaannik suliaqarnissaq pingaartutut isigaaq. Taamaaliorneq avatangiisitigut iluaqutsiissaaq, atuisunut toqqagassaqarnerulersitsissalluni, kiisalu nioqqutissat puuinik akitsuummit iluanaarutissiinerussalluni. Taamaammat Naalakkersuisut aalajangernissamut toqqammavissaqarnissaq siunertaralugu, kiisalu atulersitsinnaanermut pilersaarusiornissaq pillugu sukkanerusumik siuariartornermik qulakkeerininnissaat naatsorsuutigineqarpoq. Suliap tamatuma 2022-p ingerlanerani tigussaasunngortinneqarnissaa isumaqatigiissuteqartut kissaatigaat.

Isumaqatigiissuteqartut aamma isumaqatigiissutigaat inuussutissarsiutit siuarsarnissaannut aningaasat Innovation Greenland aqutugalugu atugassanngortinneqartussat ukiumut 800.000 kr.-nik qaffanneqassasut. Suliniutit tamassumani 2021-mi suliniutit qaffasissusiannut uterteqqinneqassapput taamalu aningaasanut inatsisissatut siunnersuummi ilaasut immikkoortumi sipaarutit atorunnaarsinneqarlutik.

COVID-imik aatsuunneq peqquutigalugu takornariaqarnermi kinguariarneq akiorniarlugu tamanna pitsanngorsarneqartariaqartoq isumaqatigiittoqarpoq. Tamatumunnga Visit Greenlandip suliaanut ukiumut 1,8 mio. kr.-nik aningaasaleeqittoqarpoq.

Peqqissuunerup siuariartortinnera kiisalu inissiat amerlanerusut peqqinnarnerusullu

Isumaqatigiissuteqartuttaaq peqqinnissaqarfimmi pissutsit oqaluuseraat, tassani kræftimik napparsimasut katsorsarneqartarneranni, kigutilerinermi kiisalu qanigisanik ingiaqateqarluni angalanermi sinaakkutit pitsaanerusut ilanngullugit.

Isumaqatigiissutikkut kingullertut taaneqartumut aningasat amerlanerusut peqqinnissaqarfimmi pitsanngorsaanissamut immikkoortinneqarput. Ilisimaneqareersutut siusinnerusukku aalajangiiffigisassatut siunnersuutigineqartumut tapiliussatut peqqinnissamik isumalioqatigiissitaq pilersinneqarpoq, isumalioqatigiissitallu kaammattuutaanik imaqartumik isumaliutissiissut 2022-mi saqqummiunneqassaaq. Naalakkersuisut tassunga malitseqartitsisumik siunnersuummik saqqummiussinissaat, kingornalu Inatsisartunik taanna pillugu oqaloqatiginninnissaat, naatsorsuutigineqarpoq, tassani siunissami peqqinnissaqarfimmi sinaakkutit pingaarnersiuiinerillu ilanngullugit. Peqqinnissaq pillugu Ataatsimiititaliarsuup isumaliutissiissutissaanik nangitseqqiinnissamut aningaasat 5 mio. kr.-t ukiuni 2023-mit 2025-mut aningaasanut inatsimmi immikkoortinneqarput. Eqqarsaataavoq assersuutigalugu tamanna tulluurtut missingerneqarpat ingerlaqataasut angalasut atugaasa pitsanngortinnissaannut aamma atorneqarsinnaassasut.

Ullutsinnut naleqquttumik kigutininik narlorsaasarnermik ingerlatsinermik neqerooruteqarnissamik periarfissat misissorneqassasut isumaqatigiissuteqartut isumaqatigiissutigaat – tassani nunatsinni namminersortut ilisimasaat pioreersut atorneqarnerat ilanngullugu.

Tassunga atatillugu tamat peqqinnerulernissaannik anguniagaqarnermi taamaallaat Peqqinnissaqarfiup ilusilersugaanera tassungalu aningaasaliissutit kisimik isiginiarneqarnatik, siammasinnerusumik siunnerfeqarnissaq kaammattuutigineqarpoq. Tassani ilaatigut sumiiffinni pitsaanngitsumik inissiaqarfiusuni pissutsinik pitsanngorsaanissaq, sumiiffinnilu inissiap angissusaanut sanilliullugu ineqartut amerlassusii inissianik sanaatornissap aallunneqarnissaa naapertuunnersoq ukkatarineqarluni. Tamanna pillugu kommunit oqaloqatiginissaat pisariaqartinneqarlunilu, immikkut pisariaqartitsiviusuni inuussuttunut inissianik sanaatornissamut aningaasanut inatsisikkut aningaasaliissutit aqutugalugit sukumiisumik suliniuteqarnissaq pisariaqartinneqarpoq. Taamaammat tassunga pitsanngorsaanissamut aningaasaliissutinik ilanngussisoqarpoq.

Tassunga uiggiullugu ukiuni aggersuni inissianik taakkuninnga pissarsisinnaanerup ajornannginnerulersinneqarnissaa siunertarlugu ineqarnermut immikkoortumi aningaasalersuisarnermik aaqqissuussinerit qasukarneqarnissaasa misissornissaa isumaqatigiissuteqartut pingaartut isigaat, ingammik ilaqutariinnut inuussuttunut isertitakitsunut sammititamik. Tassunga atatillugu 95/5-mik aaqqissuussinerup isertitanillu killiliussat nalimmassarneqarsinnaanerat ilanngullugit misissorneqassapput. Sanaartornermut aningaasaliissutit qaffanneqarnerisa ilaatut Qasigiannguani, Tasiilami, Kangaatsiami, Ittoqqortoormiini Upernavimmilu inuussuttunut inissianut pilersaarusiornissamut kingornalu sanaatornissamut immikkoortitsisoqarnissaa isumaqatigiissuteqartut qilanaaraat.

Sumiiffinni peqataatitsinerup aningaasarsiornerullu annertunerpaamik iluaqutsiinissaa siunertarlugu, sanaartorneq sanasunik sanaartortitsisunillu nunaqavissunik atuilluni ingerlanneqassasoq isumaqatigiissuteqartut piaarnerpaamik qulakkeerneqarnissaa pingaartippaat.

Inissianik attartortittakkanik aaqjissuussinerup, ilaatigut ullumikkut immikkoortup allaffissornikkut aqunneqarneranik pisariaqanngitsumik akisutitsisup, ilaatigullu immikkoortuni amerlasuuni mikisuni pisariaqanngitsumik aningaasarpassuarnik illikartitsinertigut aningaasanik taakkunannga ingerlaavartumik aserfallatsaaliinermut atuinani pituttuisup pisariillisanissaa pisariaqartinneqarpoq.

Politikikkut tunuliaqutserneqartumik iluarsartuussinissanillu kinguaattoorneq annertusiartuinnartoq unikaallatsinniarlugu, kinguaattoornerit allat annertusiartunnginnissaat, kiisalu innuttaasut inissianik pisariaqartitaasa inissiallu pissarsiarineqarsinnaasut ataqatigiinnissaannik pilersitsinissaq siunertarlugu 2022-mi ineqarnermut isumaqatigiissusiortoqassasoq aalajangerneqarpoq. Inissiat peqqinnartut ullutsinnullu naleqquttut akiliisinnaassutsimut naapertuuttut, akissaatikitsullu soorlu ineqarnermut tapiissutit atorlugit periarfissaqarfigisaat anguniagaapput. Tassunga atatillugu isumaqatigiissuteqartut ineqarnermi immikkoortuni kalluarneqartuni 2022-muogallartoq ineqarnermut akiliutit qaffanneqarnissaannik kalerriutigineqartut atorunnaarsinnissaat aalajangerpaat. 2022-p ingerlanerani siunissami ineqarnermut akiliutit ineqarnermut immikkoortut akimorlugit nammaqatigiittumik qanoq ingerlanneqarsinnaanerit nalilersorneqaaqqissaaq. Attartortut siunissami ineqarnermut akiliutit aqqutigalugu aamma iluarsartuussineruput peqataassasut Naalakkersuisut erseqqissaatigaat.

Kinguaattoorutit annertuut

Piffissap sivikitsup ingerlanerani sanaartornermi susassaqaqfimmi kinguaattoorutit annertuut, ukiorpassuarni ikippallaanik iluarsaassinernut aningaasaliisarnertigut pilersimasut iliuuseqarfiginissaasa pisariaqassusaa isumaqatigiissuteqartut tunuliaqutserpaat.

Tassani ingammik Namminersorlutik Oqartussat inissianik attartortittagaani, kollegiani, ilinniarfinni, Mittarfearfiit atortuutaanni, ilaatigullu namminersorlutik oqartussat umiarsualiviutaanni, kiisalu annertusiartortumi Nukissiorfiit atortuutaanni kinguussaanerit pineqarput.

Ajornartorsiutit annertussusaat paasinarsisinniarlugu allaffissornikkut suliaqartoqarpoq, isumaqatigiissuteqartullu 2022-p ingerlanerani aaqjiissutissatut pilersaarutinut isummernissaq naatsorsuutigaat. Isumaqatigiissuteqartut periarfissat tamaasa ammaffigaat, atuisut akiliuteqarnerat ilanngullugit. Ajornartorsiutit ilaat aningaasanut inatsimmi sanaatornermut aningaasaliissutit qaffanneqarneri ikiortigalugit aaqjiivigineqarsinnaapput.

Nukissiorfinnut tunngatillugu suliffeqarfiup aningaasaqarnerata attanneqarsinnaanngitsumi inissisimanagera isumaqatigiissuteqartut isumaqatigiissutigaat. Kukkunersuineri nalunaarummi Nukissiorfinnut suliarineqartumi suliffeqarfiup maanna akigitinneqartut toqqammavigalugit piffissaq ungasinnerusoq isigalugu illersorneqarsinnaasumik ingerlasinnaannginnera takutippaa. 2022-p ingerlanerani Nukissiorfiit aningaasaqarneranni oqimaaqatigiissitsinermik nassataqartumik aaqjissusiortoqassaaq, tassani suliffeqarfiup pilersuineri atortuisa aserfallatsaalineqarnerisa pitsanngoriartuaartinertat ilanngullugu. Ajornartorsiutip annertussusaa eqqarsaatigalugu atuisut akiliutaasa annertusineqarnissaat avaqunneqarsinnaanngilaq. Nukissiorfiit aamma allaffissornermi ineriartornera naleqqunnersoq malinnaaffigissallugu pisariaqarpoq. Nuna tamakkerlugu assigiimmik akeqartitsinikkut nammaqatigiinnermik periuseqarnerup attanneqarnissaa isumaqatigiissuteqartut isumaqatigiissutigaat.

Piujartitsineq, silaannaap pissusaa avatangiisillu

Qasigianguit/Aasiaat eqqaanni nutaamik erngup nukinganik innaallagissiorfiliornissaq, kiisalu Utoqqarmiut Kangerluarsunnguani erngup nukinganik innaallagissiorfimmik alliliinissaq pillugu inatsisartut inatsisaannik Inatsisartut akuersinerat isumaqatigiissuteqartut Kalaallit Nunaata CO₂-mik aniatitsineranik killiliinissamut alloriarnertut pingaarutilittut isigaat. Ataavartumik nukissiuuteqarnermut aningaasaliineq aningaasaqarnermut ineriartortitsinermik pilersitsissaaq. Peqatigisaanik avatangiisinut ajoqutaasinnaasut allat annikillisinneqassapput. Kalaallit Nunaata Parisimi isumaqatigiissummut ilanngunnera aamma inuiaqatigiinnik silaannaap pissusaanut tunngatillugu piujartitsinerusunut alloriarneruvoq. FN-ip nunarsuaq

tamakkerlugu piujuartitsisumik ingerlatsinermut anguniagai immikkoortuni akimuisumik ataatsimut suliniarnermi atuutsinneqarnissaat isumaqatigiissuteqartut pingaartippaat.

Isumaqatigiissuteqartut isumaqatigiissutigaat Kalaallit Nunaata Kujataani aningaasaqarnerup ataatsimut pitsanngorsarnissaa siunertarlugu nunap immikkoortuani piujuartitsilluni ineriartortitsinermut nutaanik pitsaannerusunillu sinaakkusiinissaq pisariaqartoq. Suliniutit aalajangersimasut nunatsinni imminut annertunerusumik pilersornermik siuarsaasinnaasut aammali ilinniartitaanermik inuussutissarsiutinillu ineriartortitsinermut pitsaannerusumik sinnaakkusiinissap pilersaarusiornissaannik pisariaqartitsisoqarpoq. Pilersaarutit taakku tassaaginnassanngillat tapiissutinut aningaasaliissutit qaffanneqarnissaannik inassuteqaatit aammali sulisoqarfiit suliniutillu atuuttut ilanngunnerisigut annertuumik ingerlatsinermi iluaquteqartitsilernissaq pissutsillu pitsaasumik imminnut sunneeqatigiilersinnissaat.

Inernissatut naatsorsuutigineqartoq

Pingajussaaneerinninnissamat allannguutissatut siunnersuutikkut 2022-mut IS-ip inernerani 7,6 mio. kr.-nik sinneqartoortoqassaaq. Piffissaq 2022-2025 tamakkerlugu IS-ip inernerani 107,7 mio. kr.-nik ataatsimut sinneqartoortoqassaaq.

Ukiuooortumik aningaasanut inatsit isumalluutini akimuisumik pingaarnersiuiinermi akisussaassuseqartumillu aningaasaqarnermut politikimik isumannaarinninnermi sakkut pingaarnesarigaat isumaqatigiissuteqartut aalajangiusimavaat. Suliniutini nutaanik angisuunik aningaasartuuteqarfiusussanik aaqqissuusseqqinnissanillu saqqummiussineq akuersiumaarnertu aningaasanut inatsimmik isumaqatiginninniarnerni toqqaannartumik pisassaaq.

Isumaqatigiissuteqarlutik atsiqataasut ilaata isumaqatigiissummik eqqortitsiinnarsinnaaneq ajornartutut isigilissappagu, isumaqatigiissummik qimatsinissaq sioqqullugu taamaaliornissaq pillugu isumaqatigiissuteqartunut allanut allakkatigut ilisimatitsisoqartarnissaa isumaqatigiissusiortut isumaqatigiissutigaat, taamaaliornikkut isumaqatigiissut qimanneqartinnagu isumaqatiginninniartoqarsinnaaqqullugu.

Ilanngussatut suleriaqqinnissami allannguinnissanilu 2022-mut aningasaanut inatsisip akuersissutigineqarnissaanut atatillugu allannguutissatut siunnersuutitut saqqummiunneqarumaartunut pingaarnersiukkanut takussutissiivik ilanngunneqarpoq.

Tamanna tunngavigalugu isumaqatigiissuteqartut 2022-mut Aningaasanut Inatsit taamaalillutik isumaqatigiissutigaat:

Nuuk, ulloq 18. november 2021

Inuit Ataqtigiit

Naleraq

Atassut

Demokraterne

Naalackersuisut

Aningaasanut inatsimmut isumaqatigiissummut ilanngussaq.

Suliniutit nutaat

Suliniutit nutaat tulliuuttut ingerlanneqarnissaat isumaqatigiissuteqartut isumaqatigiissutigat:

1. Qaortumi mittarfik 1.500 m. Ingerlatsineri aningaasaliissutini tiguneqassaaq, 2026-2028-mili Tusassimit ukiumut 50 mio. kr.-nik iluanaarutini, ilanngaateqangitsumik akileraarusiinnikkut isertitat qaffarilaassutaannik 30 mio. kr.-nik, kiisalu Air Greenlandimit katillugit 65 mio. kr.-nik 2021-mi ataasiartumik akiliissutitigut taperneqassalluni, 2028-p tungaanut ataatsimut aningaasalersuineq imaassaaq:

	2021	2022	2023	2024	2025	Inern. 21-25	Inern. 26-28	Katillugit
Aningaasalersuineri pisariaqartitat								462,0
Ammassanniarnermi immikkut ittumik isertitat		-45,5						-45,5
Tusass-mit iluanaarutisiat							-150,0	-150,0
Mittarfiliortiternermi ilanngaateqangitsumik akileraarutit				-20,0	-10,0	-30,0		-30,0
Air Greenlandip oqartussanik sullissineranut atuineq annikitsaq	-65,0					-65,0		-65,0
Ataatsimut aningasaalersuutit	-65,0	-45,5		-20,0	-10,0	-140,5	-150,0	-290,5
Aningaasalersuutissat sinneruttut								171,5

		2022	2023	2024	2025
10.13.11	Aktiaateqarluni ingerlatseqatigiiffinnut aningaasannorlugit aningaasartuutit	29	93	50	

2. Sinerissap qanittuani qaleralinniarnermut akitsuutip peernerat, kiisalu avataasiortuluni qaleralinniarnermi raajarniarnermilu akitsuutit qaffannerat. Taakku saniatigut kaffit, te timmisallu akitsuutaasa peernerat

		2022	2023	2024	2025
24.11.25	Qaleralinnut akitsuut (sinerissap qanittua)	16			
	Qaleralinnut akitsuut (Avataasiortut)	-1,5	-1,5	-1,5	-1,5
24.11.12	Raajanut akitsuut	-6,5	-6,5	-6,5	-6,5
24.11.10	Eqquusuineri akitsuutit	5,7	5,7	5,7	5,7

3. Aalisarneq pillugu Ataatsimiititaliarsuup sulineranik nangitseqqiinerit aalisarnermut inatsisit atuuttut nutarternissaannut atatillugu misissueqqinnissamut piareersaanissamullu 1 million koruunit 2022-mi immikkoortinneqassapput.

		2022	2023	2024	2025
20.11.70	Suliniutinut nutaanut sillimmatit	1			

4. Kalaallit oqaasiinik ineriartortitsinerup pitsanngorsarnera – Oqaasileriffimmut aningasaliissutit ilaneqarput.

		2022	2023	2024	2025
40.94.27	Oqaasileriffik	1	1	1	1

5. Karrat Kangerluannut pilersaarut (ilaatigut Illorsuit).

		2022	2023	2024	2025
20.10.35	Immikkut ittumik suliniutit – Karrat Kangerluat	4,4	4,9		

6. Tunumi qilalukkanik qernertanik kisitsineq

		2022	2023	2024	2025
77.05.02	Pinngortitaleriffik	3,1	0	0	0

7. Sipaarniutitik utertitsineq

		2022	2023	2024	2025
20.11.56	Missingersuutitut iluarsiiissutit, allaffissorneq	22	23,9	25,9	25,9

8. Tarnikkut napparsimasunut illorsuarmik, kollegianik suliniutinullu allanut pisariaqartunut periarfissiiumalluni sanaartornermut sillimmatinik pilersitseqqinneq. Sinaakkutinik annertuliineq aamma ukiuni kingullerni aningaasanut inatsisini sanaartugassanut aningaasaliissutit appartinneqarnerannut atatillugu qiviarneqassaaq. Inuusuttunut inissianut, umiarsualivinnik illunillu allanik iluarsaanernut aamma ilinniartitaanermi illut aserfallatsaaliugaanerannik nalunaarsuinerneq aningaasat tamassumunnga ilanngunneqassapput.

		2022	2023	2024	2025
80.00.01	Nuussinissanut sillimmatit		26	85	85
73.94.02	Nukissiorfiit	5,5			
84.40.12	Ilinniartitaanermut sanaartukkat	8			
87.72.13	Immikkut iluarsartuussinerit	7			
87.73.12	Umiarsualivinnut talittarfinnullu aningaasaleeqqinnerit	5,5			
89.72.12	Inissialiassat taartissanillu inissialiortiterneq	8			

9. 2022-mi KNI A/S-p ajornartorsiorneranut ikiorsiissutit, kingorna ungasissumut sammisunik aaqiinerit

		2022	2023	2024	2025
73.04.09	Missingersuutunik iluarsineq	10			
73.04.08	Savaaqganik toqoraavimmut sullissinissamik isumaqatigiissut il.il	4,52			

10. Pilersitseqqinneq

		2022	2023	2024	2025
20.11.70	Suliniutitut nutaanut sillimmatit		35	35	35

11. Peqqinnissaq pillugu Ataatsimiititaliarsuup isumaliutissiissutaanik nangitseqqiinnermut aningaasat.

		2022	2023	2024	2025
20.11.70	Reserve til nye initiativer		5	5	5

12. Aalisarneq pillugu Ataatsimiititaliarsuup isumaliutissiissutaanut malitseqartitsinermi aalisarnermik ilinniartitaanermik qaffassaaneq

		2022	2023	2024	2025
20.11.70	Suliniutitut nutaanut sillimmatit	0,5	1,5	1,5	1,5

13. Inuussutissarsionernik siuarsaanermut suliniutit Innovation Greenlandimit aqunneqartut, ukiumut 800.000 kr.-nik amerlineqarput.

		2022	2023	2024	2025
64.10.32	Inuussutissarsionernik siuarsaanermut suliniutit	0,8	0,8	0,8	0,8

14. Takornariaqarnermut pitsanngorsaaneq, Visit Greenlandimut aningaasaliissutissat. Ukiumut 1,8 mio. kr.-nik qaffanneqassaaq.

		2022	2023	2024	2025
64.10.33	Takornariaqarnermik aamma misigisaqartitsinissamut inuussutissarsiuutunik ineriartortitsineq	1,8	1,8	1,8	1,8

15. Inissiat immikkoortortaqrifiisa ilaanni inigisamut akiliniutitut 2022-mi immikkut tapiissutit.

		2022	2023	2024	2025
72.10.18	Ineqarnermut akiliniutitut 2022-mi immikkut tapiissutit	4,9			

IS-ip inerneranut takussutissiivik

Takussutissiaq 1-imi Inuit Ataqtigiit Partii Naleqqallu aningaasanut inatsimmik isumaqatigiissuteqarnerisigut aningaasatigut sinaakkutissat imaalerput

Takussutissiivik 1 22.11.2020 nal. 13:00 isumaqatiginninniareermermi ataatsimut takussutissiivik

FL 2022 i mio. kr.	FL 2022	2023	2024	2025	2022-2025
IS-ip inernera - AIS2022	-30,6	-62,4	-36,7	-2,3	-132,1
Aappassaaneerinninnermut AS	-12,0	-9,7	-10,7	-11,7	-44,1
IS inernera - aappassaaneerinninneq	-42,6	-72,1	-47,4	-14,0	-176,2
Pingajussaaneerinninnermut					
Akilaraarutitigut isertitassanik					
missingiutinut allannguutit	-142,2	-156,5	-163,9	-163,9	-626,5
Aningaasaliissutinut allannguutit allat	1,5	-7,4	-10,3	-12,6	-28,7
Aningaasanut inatsimmik					
isumaqatigiissut	175,7	190,6	203,7	153,7	723,7
IS inernera – AI2022	-7,6	-45,4	-17,9	-36,8	-107,7

Nalimmassaanerit il.il. malitsigisaannik inernerit siuliani taanneqartut AIS2022-milu namminermi inernerit annikinnerusumik nikingassuteqarsinnaapput.